

四庫全書

集部

欽定四庫全書

慶湖遺老詩集卷五

宋 賀鑄 撰

近體詩七十二首

雨餘晚望 熙寧丙辰五月臨城賦

相應乳鳩鳴桑間返照平明津小舫度高隴一牛耕林
藪歸心健塵埃病骨輕屈騷魂爽在未許獨君清

自訟 元豐戊午六月滏陽賦

朝聽明鐘出暮隨衙鼓歸朝朝復暮暮是是與非非跡

寄升沉路言投禍福機何窮百年事端使一心違

待曉朝謁天慶作 己未下元湓陽賦

望曉謁琳宮荒庭霧氣濃曾陪羽林仗如待景陽鐘薄
宦情無幾勞生夢不容樵朋與漁伴他日會相從

送李易初還汶陽 癸亥正月彭城賦

客宦愴離羣徐方復得君青衫初試吏白面頗能文盡
舸浮春水清樽醉舞裙他年會相訪分卧北山雲

重送 張澤樂郊皆汶陽游燕之地

夾岸雪初消青青見麥苗傳聲汶陽客已解木蘭橈春
水生張澤春風動樂郊良游知不負回首念無聊

春書 癸亥二月彭城

新蠶經浴罷舊燕未來前吏局坐如夢物華行可憐
生南浦釣雨足東臯田故國負歸約塵埃年復年

擬溫飛卿 甲子七月彭城代王文舉賦

露網朱甍上風簾翠鎖前宿衾熏菡萏朝鏡拂漪連津
潤銷金筆香依撲粉綿度閒雙陸子撥恨十三弦鸚鵡

殷勤語梅檀委曲烟鮫綃乾玉筍魚鑰限金蓮團扇訓
桃葉烏絲代杏箋朱門長宵宵白馬自翩翩難釣三珠
樹徒拋七寶鞭酒闌應有待夢破即無緣信鵲新秋去
孤蟾後夜圓浪言墻外地的是洞中僊

快哉亭朝暮寓目二首

風起喜舒曠徑趨城上樓初陽動禾黍積雨失汀洲水
牯負鵠鵠山樞懸枯萋坐慙真隱子物我兩悠悠

積潦際危堞登臨西照中苔衣罥白羽槐蔭懸青蟲不

淺胡牀興無多團扇功目窮猶起羨演漾一漁蓬

題張氏白雲莊 彭城張謀父居泗州之東山

耕田數百里中擇爽塏列樹松竹結茅其間

榜曰白雲莊甲子九月置酒招予與冠陳王

李四子酒酣賦詩予得雲字

江左陶徵士高風昔所聞應慙五株柳難比一溪雲我
有乘桴約君方植杖耘悠悠竟何得晚歲盍同羣

賦得枕上聞雁 用天字甲子冬至日寇元弼

席上賦

朔吹飄驚雁寒聲徹枕前遠違沙漠雪不下汶陽田客
夢悲中夜歸期隔故年莓苔與菰米何處是湘天

和人游白雲莊二首 乙丑正月晦日與予鄉

段詢慎從成父寇元弼步出彭城之上洪門
泛舟訪張謀父于白雲莊晚歸皆被酒段集
古人句成二首示同游予因走筆和之以送
謀父後旬慎從感疾物故張復出是詩使人

泣歎彌日

原野正春風登臨一醉同陰晴時未定今古思何窮
山勢落還起溪流噎復通隱君方自得可羨爾冥鴻
可愛白雲翁前溪櫂釣蓬耕樵一逕下井臼四鄰同
倦宦終何得餘生寄此中預煩多種秫毋使酒桮空

早夏 乙丑彭城賦

吏役初無補端令樂事妨不知春遂去但愛日何長
薄雨梅含核溫風麥擢芒須容退食暇一枕夢吾鄉

辭酒 乙丑正月彭城南豐席上賦

魯酒一樽薄吾愁萬斛多塵埃斬馬劍涕泗飯牛歌髀肉生如許顛毛黑幾何功名可復道身世兩蹉跎

送陳傳道攝官雙溝 乙丑六月陳發彭城檣

舟漢祠下者累日子方抱疾不遑出餞因賦
是詩

弭節想登臨開雲護日陰青蒲泗水濶古木漢祠深應
醉杯中物誰聞澤畔吟禪房養病客輕別若為心

游滕縣時氏園池 乙丑八月賦

珍重西園主開門待子猷
城隅樹交蔭樓下水通流
鳴鶴深竹蜻蜓駐小舟可能忘夢想塵土滿徐州

自鄆還徐道中 乙丑八月賦

八月過新雨行雲弄晚涼
山川乍明晦未泰半青黃
西去真何事東還非故鄉
悠悠塵土裏無路不亡羊

早發王邨道中寄李智父 乙丑八月賦

雞鳴戒徒御驅馬度前陂
得雨人耕早遶山日上遲罷

休何復道會合邈無期賴有西來水悠悠慰我思

暮投葛墟馬上 乙丑八月賦

旬浹走千里塵埃如有緣慙無季子印可挾洛陽田廣
澤雁行去荒山雨脚縣長亭猶未見疲馬不勝鞭

汴渠夜泊示 紹彥祖 元祐丙寅二月永城

賦

耿耿度中夜浩歌誰與訓屋頭風罨岸枕底浪澎舟春
物行飄忽鄉心久滯留須明投吏部一醉驛西樓

丙寅舟次宋城作

水館四邊邨登臨奈斷魂
黃花開小徑紅粉哭高原
舟楫逢新火松楸老故園
斜陽一千里依約是蘇門

京居感興 丁卯正月賦時領將作屬

為問長安客何人識要津
長持一馬箠浪走六街塵
城闕烟中曉關河雪後春
故園桃李在樽酒願相親

玉津晚歸馬上 丁卯清明京師賦

落日南城陌東風禁火時
醉醒皆自得單袷正相宜
綠

樹侵高閣繁花洒曲池未應判節物可奈故園思

西城有懷舊好 丁卯七月予以將作屬日至

瓊林金明督察營繕偶懷陳迹惘然因賦

西郭天泉里依依得舊游綺羅紅芰曉絲管萬蟬秋柳
礙鞦韆陌萍沉袂舟年華勿復道誰為駐東流

苦竹邨南馬上 戊辰四月晦日歷陽賦

楚澤熏風後林臯夕照間漁舫沿綠岸鳥道轉荒山久
負杯中物長偷馬上閒悠悠白門路何日杖藜還

題諸葛碕田家壁 地名諸葛亮碕在烏江北

八十里與石頭城相望戊辰九月賦

晚度孔明碕林間訪老農行衝落葉逕坐聽隔江鐘後
舍燈猶織前溪水自春無多游宦興卜隱幸相容

訓桂林從叔 戊辰十一月歷陽遣使還賦

江到三湘盡山圍八桂深龍蛇塞下蟄霧露晝多陰迢
遞馳楫信殷勤訪竹林淮南風土美留滯亦何心

寄金陵倉官趙令翬通宜 趙諸王孫戊辰十

二月歷陽賦

歲律條云暮王孫興可堪羨雲歸日下隨雁滯江南卑
溼求長健登臨奈半酣西州眼中近早晚寄華緘

懷寄潘孝本兼簡其子言 潘字景仁時游宦

嶺外已巳正月歷陽賦

春色先梅嶺秋聲後桂林溪通五羊險雲近九疑陰無
雁難逢信有猿能伴吟一樽燒酒美應對阿戎斟

送張商老西上 張名夢臣吳郡人已巳九月

歷陽賦

霧氣斂陂澤鼓聲催客航
薰葭靡宿露鵲鶴盤朝陽
行役自茲遠離愁安可忘
黃華一樽酒何處望吾鄉

題烏江東隆山鄧氏亭 已巳九月賦

逋客今何許空餘接隱亭
舟隨潮水上門背夕陽
局兔策塵生蠹漁蓑雨化螢
題詩岩下石聊代草堂靈

登烏江柏子岡懷景仁 已巳十月賦

驅車柏子岡引首東南望
孤戍帶寒日長江流大荒
故

人越五嶺旅雁留三湘好待春風暖相期還北鄉

宿黃葉嶺田家 己巳十一月烏江賦

聚落荒山裏畝田歲不登牛衣障隙雪鼠穴見鄰燈
愁信魚難暝寒凝酒亦冰悵然歌白石椎枕待晨興

遊六合定山真如寺 達磨第一道場 己巳十

二月賦

隻履西歸遠何年此布金地寒蒼檜老歲晏白雲陰
燒隔溪水斷樵穿徑雪深祖心無處問俗駕晚駸駸

同道通師之香林馬上 庚午正月歷陽賦通
喜為詩從吾游甚久

冰霜節候遲淮楚早春時白草風頭急黃雲日脚垂鳥
聲投古戍馬力倦長陂吾有官箴畏勞生爾浪為

題烏江丘氏昆仲歲寒亭 植柏亭下故命是

名庚午正月賦

新甫移根遠蒼然對兩翁閉門三尺雪仰枕一庭風東
郭顏何厚西來意莫窮未應輸狹小釀酒待春叢

送左禹赴江夏尉 左字塗叟庚午四月烏江

賦

汎汎青翰舟亭亭黃鶴樓江山信清洒人物想風流美酒遣歸思新詩題勝游有魚知不食端作置書郵

高望道中 庚午五月烏江賦

積雨漲陂塘田塍插晚秧遠山宜薄暮高燕弄微涼馬革非吾願魚食饜此鄉歸期知近在猶待菊花黃

湯泉道中 庚午七月烏江賦

青石岡西下靈泉產藥苗山英如有待木客可相招蟬
帶風移樹塵隨馬度橋颺鞭吟舊句歸路不知遙

留別王掾元胥 庚午十二月歷陽賦

之子貫東年青衫試宦游顛非小賀比爽自阿戎流未
即芸香拜俄先瓜戍秋孤蓬別夜思霜月滿滄洲

檣舟當利口待風累日懷寄城中朋游二首

庚午十二月歷陽賦

一葉寄津口怒濤安可乘朝風占酒旆夜爨乞漁燈牛

渚逢新月秦淮想結冰故人他夕夢歌吹滿金陵
離憂不可解罷酒獨登臨潮落江空濶雲繁歲晏陰愁
鳴守漁罾怒犬突神林觸目增悽斷聊為澤畔吟

重別王掾 庚午十二月六日自歷陽當利口

放舟至沙夾王元胥載酒旋訪別因留宿不
發重賦此詩以貽

訪別難遽了不知寒夜長回燈撤盃案抱被宿舡倉載
聽遠雞唱稍分征雁行臨風滿掬淚吟落一衿霜

投宿清涼寺 庚午十二月望日自秦淮亭信

馬出石城門賦

建業衣冠集秦淮舟楫屯東西萬里客朝暮兩潮渾何
處契心賞片時清耳根僕夫浪見問但出石城門

金陵寄懷王掾 庚午十二月賦

征虜亭邊路望夫山下舟長江不隔夢明月祇供愁促
席歌塵斷閒窗醉墨留惜芳橋畔柳誰繫木蘭舟

秦淮夜泊 辛未正月賦

官柳動春條秦淮生暮潮樓臺見新月燈火上雙橋隔
岸開朱箔臨風弄紫簫誰憐遠遊子心旆正搖搖

鐘山法雲彥上人留中食罷游草堂寺寺即

周顒故居辛未正月金陵賦

弭楫秦淮尾登臨殊興迴難消蔬飯飽更過草堂來日
轉崑扉暝風披蕙帳開吾非海鹽令猿鳥莫相猜

訓別法堂彥上人辛未正月金陵賦

將別雁門師殷勤訪所之江湖懷北闕鷗鳥戀南枝朝

隱非吾所山英不汝欺明年東下約春水漾蘋時

易官後呈交舊 辛未九月京師賦

當年筆漫投說劍氣橫秋自負虎頭相誰封龍額侯聊
辭噲等伍濫作詩家流少待高常侍功名晚歲收

辛未龍興節日懷王掾元胥 昨歲是日子予解

舟渡江此詩京師賦

昨歲東溪口扁舟欲下江伴愁燈映慢欺睡月侵窗漫
寄書連紙誰同酒一缸何當見之子聊使我心降

廣津門東馬上 壬申二月京師賦

津頭落帆鼓薄暮尚蓬蘼疑是秦淮口扁舟醉夢中不堪隋岸北塵土一鞭風傳語端能否伯勞飛自東

久病寄二三親友 壬申八月京師賦

早昧攝生理百勞戕至真藥靈翻佐病詩癖竟窮人終負黃壚恨長違白首親一囊安可得四壁未應貧燈下塵編汨風前墓草春倘忘雞酒設腹痛勿多嗔

秋夜聞雨晨興偶書 癸酉八月京師賦時欲

扶疾東下

故國心馳北扁舟計漫東寒生一夜雨病涉兩秋風落
泊籬根葉幽憂屋角蟲何情悲節物聊自況衰翁

謝米雍丘元章見過 米名芾癸酉八月京師

賦

今古兩妙令雍丘與太丘當時號清白後日想風流吏
軒庭陰午農歌野色秋吾非荀氏老愧爾德星留

留別米雍丘二首 米辨博有才具者山林集

數十卷為人知者特水淫書學而已清狂多
忤嘗上章援予祠史之請不報輒已因以激
之癸酉十月雍丘賦

明缸通夜語累塊寫胸中水癖推劉令書名浼魯東忌
猜悲廩鼠逐熱賤雲鴻不乏佳山水東南著兩翁

好住楚公子山林何處逢官身須自乞俗眼可相容叔
夜爛猶鍛伯鸞傭且春多慙方祿隱爾汝傲吳儂

寶應夜泊 癸酉十二月賦

伏枕漳濱後維舟楚澤邊
筋骸非壯日節物迫窮年夜
雨侵床漏晨炊湊鼻烟
勞生我其分十口亦飄然

題甘露寺淨名齋兼寄米元章
米舊嘗居此

齋甲戌九月京口賦

日出天垠露江橫地軸分馳年悲落木
羈思託孤雲重
掃淨名室長招漫仕君悠悠德璋輩未辦勒移文

龜山晚泊 乙亥二月賦

春候半寒溫維舟淮上村
長林補山豁青草際潮痕
久

厭浮家役重招去國魂禪房欲舒寫烟雨促黃昏

歲暮舟居卧病懷寄金陵和上人 乙亥十二

月淮上賦

野泊歲云暮念歸期更賒津童為過客商舶是鄰家雪
密漁依冢潮迴蚌委沙南洲人健否不寄早梅花

寓泊臨淮有懷杜修撰 丙子二月賦杜公名

紘去歲總漕于此屢開燕寶訓堂

幕捲歌鬟列堂深密炬然臨風鳴羯鼓待月戲鞦韆短

韻吟牋出長簷醉帽偏斯人違薄俗何減孟公賢

舟發金陵望歷陽作 丙子四月賦

尚識歷陽道依然西照間風烟石磧戍林麓楚王山隔
水一凝佇當年百往還誰憐躍馬客哀病再投閒

江行寫望 丙子四月當塗道中賦

斜照侵疎箔微涼逗小窗青蒲故依渚白鳥屢橫江遣
興詩三百煎愁艣一雙前舟定未遠疊鼓聽逢逢

郎官湖 按李白詩序云乾元歲流夜郎遇故

人尚書郎張謂使夏口沔州杜太守漢陽王
令觴于江城之南湖張公四望超然請白標
之嘉名白因號之郎官湖席上丈士輔翼岑
靖以為知言今所謂郎官湖者占郡城之北
東于兩山間縱廣百許步固不足四望而超
然也已知其非是郡南瀕江之人持南唐時
地券尚指郎官湖為鄰蓋湖為江水所并而
去城里餘猶有洲渚隱然未泯乃湖之故防

也予丙子五月舟次沔陽求訪遺老始得其
詳因賦志之

當年賢守令載酒沔南游涼月呈新霽明湖涵素秋郎
官夏口使仙客夜郎囚促膝青螭舫連觴紫綺裘高譙
隨雨散餘躡想風流芳草失青履滄波浮白鷗江吞百
頃盡石刻一篇留宜有沉碑者前懷陵谷憂

題寶泉官舍壁 寶泉監在夏郡城東三里黃
鵠山之陰丙子八月到官後賦

偶著強名字非才但鑄金不妨稱外監況復佳山陰勝
日聊披卷清風故解衿餘生偷祿隱何等是升沉

江夏寓興二首 前篇丙子十二月賦後篇丁

丑五月賦

風與檣鳥便儂先塞雁來山經七澤斷潮自九江回漁
父猶知隱騷人枉銜才朋游正相遠梅信為誰開
陂湖感坊市江漢復縱橫沮洳莎城貼晴暘竹瓦鳴新
文添鵬賦異味識龜羹豈復悲流落官糧寓此生

九月十日寄潘邠老 丁丑江夏賦潘嘗許中
秋重九渡江見過竟不至因以誚之

明月昔如許懷人殊不來徒歌桃葉曲又負菊華開尺
紙緘愁去扁舟載夢迴他年雞黍約千里信悠哉

送蒲圻陳主簿彥升歸越 陳字登之丁丑十

月江夏賦

好在稽山北因君訪故園風流久哀歎湖水自清渾可
得千秋觀相傳百代孫時聞祖 闕 客不減漢東門

送金壇慎令猷 戊寅三月江夏賦慎字獻玉

年少寡欲奉佛甚嚴

清素復多聞天涯晚得君相延蒲塞饌細演貝多文世
味淡如水身謀散勝雲謾為花縣約聊慰此臨分


寄題盱眙杜子師東山草堂 丙子二月臨淮

賦偶亡之庚辰十月再道臨淮復得于子師

因附卷末

東山與物遠松竹蔭茅茨信有冥鴻志難藏霧豹姿會

招安石起何患德璋移後日
崑扉下游人想履綦



慶湖遺老詩集卷五

欽定四庫全書

集部

慶湖遺老詩集卷六至八

詳校官庶吉士臣陳若霖

侍讀臣孫球覆勘

覆校官中書臣宋枋遠

校對官中書臣王鍾泰

謄錄舉人臣劉禮

欽定四庫全書

慶湖遺老詩集卷六

宋 賀鑄 撰

近體詩長句上五十首

上巳有懷金明池游賞 熙寧乙卯臨城賦

西城小雨宿塵消
春水溶溶拍畫橋
拾翠汀洲白蘋發
披香宮殿紫雲高
綵舟日晚綺羅醉
油幕風晴絲管焦
俠少朋游應念我
一年佳賞負今朝

贈張士元 張字善長善為詩丙辰十月臨城

賦

夫子長貧五十年年來生事更茫然青衿稚子彼何有
白首故人誰見憐霜後鶉衣寒綻線日高魚釜凍無烟
冗官猶愧蘇司業不得時時送酒錢

雨晴西郊寓目 丁巳五月趙郡賦

城中厭雨過清和偶出西郊野思多蠶簇趁晴初摘繭
麥場經潤欲生蛾營巢黃鳥啼深樹引犢青牛飲暮河
老圃念人留佇久挽衣沾酒願相過

寄周文清 周時流寓海陵丁巳八月趙郡賦
節物驚心不久留故人相望海邊州
芟荷老盡池塘晚
鴻雁來多雲漢秋誰共清尊尋樂事獨將長幅寫離憂
明年芳草青門道好試青衫伴俠游

寄王岐 王鉅野人黃州曾孫熙寧初京師朋
游也字夷仲戊午滄陽賦

未從名宦兩蹉跎可但詩狂與酒魔
紫陌塵埃日關逐
青樓燈火夜經過當時豪縱年方少今日疎慵病更多

惟見凭闌復敲枕往來方寸奈情何

和答鄭郎中見寄 鄭臨城人名淵字鄰幾登

進士第仕至職方郎中年垂七十即謝事居

近泝水自目為泝川逸老性嗜詩雖老不廢

與予訓唱累數十百篇既來潯陽復有詩見

寄因和答之予詩用他人韻者皆不取特錄

此篇欲見斯人于集中耳時元豐己未重陽

日賦

客子由來懷故鄉
蘇門冷落白雲旁
夢隨夜月鐘前斷
詩入秋風草共荒
操板鎌靴游宦厭
開尊揮塵舊歡長
泚川逸老應相念
為倚闌干向夕陽

和田錄事君義詠雪 已未十一月滄陽賦

千里龍沙失舊荒
四來雲物助蒼涼
直疑見月應無影
未必因風始解狂
枉費鉛華闕楚女不禁湯餅試
何郎回中自是人間世
悵悵龜臺去路長

和田錄事新燕 庚午三月滄陽賦

新巢故國兩依依似與春光秋葉期
雨過池塘得泥近
日高臺榭捲簾遲
鞦韆節後初相見
被襖人歸有所思
雙侶多情擬憑杖
小牋封就碧雲詩

冠氏縣齋書事寄滄陽朋游
魏之西園在滄

陽南漳水上
辛酉四月賦

小閣燒香麝煎濃
翠苔庭院綠陰風
捲簾燕自雙飛去
敲枕人方半夢中
秋鬢先于懷縣令
春愁多似義城公
西園酒伴無消息
欲寄魚牋水自東

冠氏寺居書懷 辛酉五月賦

古刹荒涼畫掩門，鳴雞吠犬接西村。
窗間自記曾歸夢，樓外誰招欲斷魂。
漫汗新詩題琬琰，少逢佳客佩蘭蓀。
更堪愁肺經春病，負爾商歌酒一尊。

題彭城張氏放鶴亭 亭有石刻蘇眉山製文
唐之陽春亭故址在徐城之東，薛能尚書有
詩見集中。壬戌九月賦。

曾見君家亭上碑，東望風月動間思。
昔無卜築如相待，

今遂登臨是不期萬頃白雲山缺處一庭黃葉雨來時
許昌應負重泉恨當日陽春枉賦詩

九日登戲馬臺

當時節物此山川倦客登臨獨惘然戲馬臺荒年自久
射蛇公去事空傳黃華半老清霜後白鳥孤飛落照前
不與興亡城下水穩浮漁艇入淮天

九日呈李成父 癸亥彭城賦

城中霧雨曉冥冥坐失城頭百尺亭行樂固知非我事

苦吟猶得有君聽
未應白髮饒新貴
任使黃華笑獨醒
異日官尋雞黍約
太行長繞故園青

題彭城南臺寺蘇眉山詩刻後
癸亥十月徐

之走卒還自京師誤傳蘇黃州被召南臺寺
公舊題數詩先摹刻諸石因賦此書其左

秋風幾度老江籬
鼎水眉峰隔夢思
下走誤傳宣室召
上前誰進子虛辭
東坡麋鹿同三徑
西掖鸛鷺占一枝
獨有野僧違一俗
翠珉新勒舊題詩

春懷 甲子二月彭城賦

東風吹雪陰復晴西日冉冉林間明著水苔衣漸涵綠
向陽竹鞭初引萌官糧得飽酒不足春物有意人無情
馳書相謝五陵俠汗板塵鞢今半生

登快哉亭有屬 甲子三月二十五日登快哉

亭偶聞舟中吹楊華者有懷京師昔游因賦
南浦東風拂水文汀洲芳草綠羅裙桃花舊葉應相望
楊柳新聲我獨聞酸鼻可憐香欲絕斷腸不待酒初醺

斜陽歸去書窗下一幅蠻牋賦夢雲

和彭城王生悼歌人眇眇
眇眇馬氏善書染
死葬南臺即鳳皇原也生賦詩十篇因和其

一甲子四月望日

東園花下記相逢倩眇偷回一笑濃書麝尚緘香豆蔻
鏡奩初失玉芙蓉歌闌燕子樓前月魂斷鳳皇原上鐘
寄語虞卿謾多賦九原無路達魚封

臨汭亭送客還馬上作
甲子九月彭城賦

袞袞塵埃與願違
可堪持酒送將歸
壯心已服駑駘老
羈思常先鴻雁飛
十口無厭太倉粟
四鄰分采故山薇
何時偃卧柴桑里
自訟淵明昨日非

送陳傳道攝雙溝戍商稅
乙丑六月彭城賦
牆外長川擁萬舟
門前山色入南州
風來浦口客爭發
日下庭陰印未收
乍厭折腰從吏役
屢應回首念朋游
病夫頗有東流興
預約清尊為少留

送彭城周主簿建中移黃縣令
周字元通乙

丑七月賦予方抱疾

客館逢迎泗上州
酒籌詩卷慰淹留
九層燈火偃王塔
四面溪山彭祖樓
此去君辭棲棘地
年來吾有負薪憂
終期一過河陽縣
相對春風話舊游

寄題狄丘李偉官舍東齋
李字子微新葺東
齋成有書求詩因次書中語以題之乙丑七
月彭城賦

樹竹開窗小屋東
低簷却日竹通風
長年馳騫欲何往

終日退藏于此中未厭睡魔常有在苦思人事即無窮
躬耕不是悠悠計來作蘇門鄰舍翁

病後登快哉亭 乙丑八月彭城賦

經雨清蟬得意鳴征塵見處見歸程病來把酒不知厭
夢後倚樓無限情鴉帶斜陽投古刹草將野色入荒城
故園又負黃華約但覺秋風鬢上生

送李宗古錄事謝病南歸 李字從已乙丑八

月彭城賦

十旬病免謝雞羣
收得閒身付白雲
南浦少留闕別賦
北山相待敢移文
松舟桂楫曉將發
菰葉鱸魚秋未分
異日有懷長笑客
西飛燕子一相聞

汶上留別李智父 乙丑八月賦

一馬西投汶水濱
自驚愁鬢帶塵紛
秋風盡日吹黃葉
心事經年寄白雲
去矣尺書勤訪我
醉來尊酒強歡君
北窗絡緯寒聲急
明夜傷心獨自聞

答陳傳道 陳以予領寶豐錢官每有賀監之

呼因賦此詩戲為答乙丑九月彭城作

吾家季真登大蓬我為斗筭來寶豐公乎時以監呼我
自笑名同實不同樽酒相望今夜月鱸魚又負一秋風
少須婚嫁匆匆畢會買扁舟下浙東

懷寄寇元弼 時寇官荆山戍乙丑九月彭城

賦

君投筦庫可知非我飽官糧又願違舊國秋高鴻雁過
長淮水落白魚肥西風吹夢端相覓南物留人也念歸

何日蘆軒下雙榻滿持樽酒洗塵機

招寇元弼兼呈白雲莊張隱居 乙丑九月彭

城賦

長缺長缺歸來乎十口想厭淮南魚游宦非徒飽而已
浮生且問樂何如定無佳客清尊酒賴有古人黃卷書
我亦塵埃同病者與君長愧白雲居

答王文舉 王詩有何日面青山相竝兩茅屋

之句乙丑九月彭城賦

卷六
茫茫塵土欲安之珍重吾人箇處期綠野相隨一藜杖
青山正對兩茅茨自憐慙慙負平昔尚敢婆娑臨莫遲
第恐阿戎猶喜仕他時不與五君詩

題淵明軒 陳傳道葺雙溝官舍瀕水之北軒

索名於我因命曰淵明軒陳即日去職予高
斯人為賦是詩寄題軒上乙丑十月彭城作
淵明軒榜揭門眉夫子高情俗不知未仰秣稊供歲計
本于松菊有心期卧來不淺羲皇興歸去何慙鄉里兒

窗破簷傾從此始祇應風月解相思

將發彭城作 元祐丙寅正月作

四年吟笑老東徐滿目溪山不負渠得米徑須償酒債
有田便擬卜吾廬明朝門外扁舟雪別夜燈前滿紙書
會問匆匆解攜客相思命駕定何如

留別張白雲謀父 丙寅正月彭城賦

三年官局冷如冰炙手權門我未能賴與白雲之隱者
不持黃卷即尋僧蕭蕭簾箔風披竹草草盃盤雪洒燈

塵土浮游漫相遠吳魚燕雁兩難憑

留別寇定字應之元弼兄子丙寅正月彭城

賦

不見步兵今一秋年來復與仲容游蒼顏白髮慙哀暮
縱飲狂歌作輩流顧我宦情真漫浪為君行計幾淹留
能尋三月皇州約拍手同登賣酒樓

永城邂逅周元通再索詩贈別周將海道之

官黃縣丙寅二月賦

泛泛流萍袞袞蓬偶然南北偶然逢一樽通濟橋邊酒
兩夜臨灘驛外鐘行矣風波宜尚慎歸哉塵土不相容
事功早立須知退學稼他年訪老農

寄題泉南陳氏步雲亭 永城主簿陳琳字伯

雋居泉南之東山有亭名步雲出圖求詩于

予丙寅二月賦

紫翠峰前水一灣趣亭微徑白雲關漁樵不見攜筇去
猿鶴相隨采藥還晚月帶潮來海上春風吹雨到人間

恨君輕為蒼生起，曾得東山幾日間。

題永城園水亭 丙寅二月賦

詰曲池塘碧玉流，袂亭孤占小汀洲。
長紉洲上芳蘭佩，不繫簷前畫鷁舟。
好泛羽觴修舊事，為書繭紙記清游。
季真待得東還日，初見紅蕖十畝秋。

招同畢紹寓泊永城招李深昆仲 畢字彥祖

李字道源丙寅二月賦

滿城楊柳正黃繁，幾處秋千出短垣。
經雨河流識清淺，

帶雲春色乍寒暄從來嵇阮耽琴酒
況得機雲好弟兄
咫尺津亭望齋館杖藜相過莫辭煩

送畢彥祖先之京師 丙寅二月賦

日日東風吹旱雲弄鞭低帽送西曛
客亭五里復十里
春物三分今二分但解征衣平酒債
莫隨肥馬作塵紛
扁舟不及清明約紫筍朱櫻未負君

將發永城留題李齋壁 丙寅閏月賦

匹馬扁舟寄此身可憐投老尚迷津
黃塵是處隨游子

明月相逢即故人東道琴尊能惜夜西園花絮欲傷春
分攜後日匆匆去燈火虹橋夢更頻

京居春日遣懷 丙寅二月賦

青梅小葉柳長條相對春風各動搖物色依依如有待
人情忽忽自無聊五陵劍俠知誰健三徑車弓不我招
好去廣津門下水新秋穩送木蘭橈

送趙令時之官陳州兼簡周文清 趙字景貺

越懿王玄孫時蔡僕射鎮淮陽丙寅十二月

望京師賦

朱衣白面懿王孫好去淮陽事相君已放扁舟下南浦
更持尊酒醉西曛青雲計自此行始明月惜從今夜分
擬仗短書裁不及但傳窮達報知聞

汴上有懷李易初 丁卯三月京師賦時予請
罷大匠屬為淮南行

何處經行特惘然津頭曾送木蘭船桃花春水生前夜
楊柳秋風憶故年驛路尺書疑斷絕官倉斗米愧留連

飄飄復作江湖計從此長安是日邊

訓宗室令率惠墨 令率字景道丁卯四月京

師賦

麝煤新劑黜而堅誰謂奚生法不傳信是文房希代寶
益知公子過人賢蔡中郎老喜飛白揚執戟窮耽草玄
雅意官要瓊玖報十九聊以助吾顛

陳留南城馬上簡李公年 李字之茂戊辰二

月賦

南郭何人卜築幽平田高樹帶清溝隔牆野鳥啼晴晝
駐馬行人照白頭二頃難尋歸老計一尊宜結探春遊
步兵不惜供厨寶更作東風數日留

寓泊金陵尋王荊公陳迹 戊辰三月賦

晚泊扁舟一問津依然節物思羈人江山月照六朝夢
桃李風吹三月春宅枕謝公墜下路詩尋蕭寺壁間塵
可須尊酒平生約長望西州淚滿巾

答孫休兼簡清涼和上人二首 孫岐山人字

安之戊辰三月邂逅于金陵清凉寺休家流
以兩篇見投因答之

聲迹相聞忽此逢杖藜蕭散一相從平生詩酒真吾事
何處江山不爾容芳草自生南北路孤雲難繫往來蹤
異時荒戍長回首風送石城樓上鐘

渭北人遊楚水東論詩說舊偶從容鄉闕此日幾多遠
春酒與愁相勝濃且免牛衣愧妻子莫將羊酪詫吾儂
哀王孫賴彌天釋官學揚州飯後鐘

春懷有寄代同行作 戊辰三月金陵賦

未應一笑為千金且解尊前綠綺琴
歸雁不將書北去行雲長伴日西沉
楚蘭徑遠飛黃蝶湘水簾空對綠陰
無復賞心訓節物斷腸翻詠白頭吟

送潘景仁之官嶺外兼寄桂林從叔 戊辰三

月金陵賦

夜銜舟尾晝聯檣齊發都門到楚鄉
我欲塵埃投袞袞君方湖海去茫茫
傷心客路逢寒食回首家園但夕陽

金匱要略卷六
想見步兵應訪問仲容無復竹林狂

同王克慎宿清涼寺兼示和上人孫安之王

字周臣寺有白雲上方戊辰三月賦

六代風流不可尋石頭勝槩古猶今
疎鐘答响江山迥啼鳥忘形松竹深
借問白雲誰卜築擬要明月共登臨
終投逸少興公社蔬粥麻衣事道林

答王拙見寄 王字間叟戊辰五月石蹟戍賦

好在金陵王隱君尺書忽與我相聞
尊鱸久負秋風約

猿鶴終尋舊日羣
橫笛卧吹南浦月
杖藜笑度北山雲
六朝陳迹何須問
一曲滄浪酒十分

慶湖遺老詩集卷六

欽定四庫全書

慶湖遺老詩集卷七

宋 賀鑄 撰

近體詩長句下五十首

寄別僧芝 吳僧法芝字曇秀姓錢氏戊辰九月
邂逅于烏江湯泉佛祠將為京都之遊既
相別馬上賦此以寄

不見江南湯惠休芝錢今也嗣風流燒香弄筆一生事
躡屐佩囊千里游乞酒未還黃菊晚擬詩初就碧雲秋

臨高跂馬君行矣從此安期始欲愁

度黃葉嶺懷寄清涼白雲庵主 戊辰九月烏

江賦

黃葉嶺頭黃葉飛白雲庵伴白雲歸葉隨遊子終相失
雲伴禪翁得所依會解腰間斬馬劍宵尋江上釣魚磯
焚香掃地雙林下願贖今生種種非

與張歷陽追懷從禽之樂因賦 戊辰十月

宜秋門外養鷹坊好草坡頭射雉場油幕檀廬張野飲

錦袍貂帽結戎裝興闌落日黃塵斷夢後西風白髮長
誰念江湖獨流寓此情難話與漁郎

歷陽姥 下馬上有懷京都游好 戊辰十月

晦日賦

楚澤初冬正穫田孤鴻欲下却翻然人烟隱約青山郭
雲物離披小雪天送別枵盤猶昨日勞生鞍馬遂窮年
故人多在金閨籍誰念心如寸斷絃

烏江石跋背晚望有懷故園 戊辰十二月賦

山色相銜類太行江流東去亦渾黃鱸魚膾美招來客
鴻雁書遲夢故鄉五斗月支何足道一帆風便可能忘
歸田有計非今日莫把移文揭草堂

登烏江寶泉寺南山望金陵作 已巳三月賦

我愛金陵望不厭獨尋微徑躡晴嵐柔霜淺草三月尾
踴塔飛樓一水南苒苒流雲牽仿佛遲遲艷日助醺酣
何須拊手歌桃葉已覺王郎思不堪

烏江東鄉往還馬上作二首 已巳七月賦

黃塵隨馬染征衣十里江皋送客暉
廢井草荒鼃黽怒下田沙漲芋魁肥
解纓拂樹弄清淺橫榻掃雲飛翠微
人生事事不如意終日念歸何日歸

悠悠東去欲何之草草西還可是歸
殘日兩竿荒戍遠青山滿眼故園非
江田經雨菰蔣熟石路無風蠓蠓飛
回羨耕夫閒勝我早收雞犬閉柴扉

送歷陽潘司戶瑤移令歸東魯 己巳八月賦

衰俗紛紛務近功幾人心迹與君同
低回州縣青衫列

踴躍聖賢黃卷中
牛渚江山空夜月
河陽桃李再春風
相望魯衛無多遠
異日能尋賣藥翁

再送潘仲寶兼寄彭城交舊 己巳九月賦

風雨扁舟幸少留
為君持酒話徐州
白魚紫蟹秋初美
戲馬飛鳴夢屢游
二阮年來知健否
季真老去盡歸休
白雲莊畔多閒地
不惜橫刀直換牛

九日懷京都舊游 己巳石蹟戍賦

昔年九日登臨處
把酒梁王舊吹臺
今年九月登臨處

江上黃華殊未開一川落日隨潮下萬里西風送雁來
節物可驚人易老宦情歸計兩悠哉

戲答張商老 己巳九月賦

楊子江頭兩信潮送君西去木蘭橈依依暮雨鴛鴦夢
嫋嫋春風豆蔻梢細字碧牋隨雁到小簾朱戶抵天遙
長安觸緒牽情地不特魂消骨亦消

題定山寺法遠上人壁 己巳十二月賦

支郎風味喜相親乘興來尋雪後春夾徑竹陰疑礙馬

隔江山色似招人豈無暇日容高卧如有閒田願卜鄰
預約東城二三子歲時相過莫辭頻

自歷陽泛江至赤埭訪別曹解 庚午正月賦

我訪故人不待招滄江謂廣纔容舫離城五點寒更急
著岸兩竿晴日高別來書尺正坐懶老去鞍馬何堪勞
明年淮上更攜手醉步卧虹千丈橋

再由赤埭有懷曹夢得 庚午正月晦日賦

江上顛風倒客檣江豚舞浪卷渾黃故人漂泊知何處

何日平安到故鄉
野色蒼茫春尚淺
夢魂惝恍夜仍長
可無百斛兵厨醞
此段離憂未易忘

宿芥塘佛祠 壁間得魏湘畢平仲張士宗回
所留字皆吾故人也
庚午三月賦

青青薺麥欲抽黃
浩蕩東風晚更狂
微徑斷橋尋古寺
短籬高樹隔橫塘
開門未掃楊花雨
待曉先燒柏子香
底許暫忘行役倦
故人題字滿長廊

送畢平仲西上 畢字夷直
庚午五月歷陽賦

吟鞭西指鳳皇州好趁華年訪昔遊
新樣春衫裁白苧舊題醉墨滿青樓
鳴鼃雨細生棹潤颺燕風高報麥秋
須念江邊桃葉女定從今日望歸舟

烏江廣聖寺虛樂亭 庚午六月賦

避雨孤篷泊柳陰潮回溪曲稻花深
有時白鷺窺魚下竟日青鼃伴我吟
酒敵無人情落莫雲鄉何處老侵尋
誅茅擬卜終焉計不為清風暫解衿

烏江北道中作 庚午八月賦

寒麥田疇雪糝花舊潮洲渚水吞沙鳬鷺長作漁舟伴
桑柘深藏老圃家濁酒縱賢誰與醉青山有價不容賒
南來學得滄浪唱却著征衣袖馬搥

烏江泛舟寓目 庚午九月賦

滄江浩渺寄星槎望極紛紛兩眼花但見潮頭澍木杪
直疑山背落天涯鴟夷信得平生樂仲御尤宜抵死誇
傖父慙非能賦手漁郎若箇是詩家

遷家歷陽江行夜泊黃泥潭懷寄馮善淵庚午

九月賦

黃泥潭口檣舟蓬回指東城祇眼中半夜鳬鷺先覺雨
連江葭莢自生風青燈解作無眠伴白酒難招一醉同
從此相思寢相遠便憑歸櫂附詩筒

檣舟當利港作 庚午至日賦

為問溪頭潮淺深片帆長挂北歸心夜風吹雪曉尤怒
午日破雲寒復陰江淮行役殊未已京洛朋游安事尋
何時穩坐飽粗飯鼓腹東臯農闕吟

放舟下江留寄王元胥 庚午十二月賦

檣楫淹留已涉旬小窗猶得酒相親
寒潮不應溪流溢
病客未行舟子嗔揮手便分今夜月
斷腸先見隔江春
鳳皇臺上長回首何處高城與故人

興龍節日渡江懷寄二友弟兼示同行 元祐

庚午賦

燕庭冠珮拜爐香
九劍紛紛想定場
江上烹魚猶得信
座中驚雁已離行
澆愁酩酊一尊酒
破睡咿啞兩牖牀

不特賦詩懷二仲故呈几韻惱支郎

訪金陵王間叟不遇留別 庚午十二月賦

歌成五噫賃春者藥不二價奪牛翁哀俗何知貴公子
清貧頗有昔人風君方上塚渡沔去我適乘舟投剡中
差池相失重回首好住海鷗忘塞鴻

題金陵長干寺塔 庚午十二月賦

南國長干古佛祠浮圖鴛瓦碧參差欲追東閣登高作
非復六朝全盛時簷角西風挂星斗牆陰寒雨嘯狐狸

劫灰終換人間世石甃金棺好護持

題金陵天慶觀鍾阜軒 辛未正月賦

霞構雲扉不著關
薨簷開處見人間
斷牆廢井連東第
白塔青松對北山
昨夜桂娥奔月去
經秋芝蓋御風旋
玉虛真籍家聲在
再熟金桃願一攀

再訓訥師兼簡清涼和上人 辛未正月賦

莫謂功名是可希
定知求法不求衣
此身于世百無用
異日與君同所歸
遮眼何關黃卷在
安心更悟白牛非

清涼有道平如掌豈比他方大鐵圍

阻風白鷺洲招訥上人 辛未正月賦

鳳皇臺下鳳皇巢白鷺洲邊白鷺濤舟未解維先望見
風能傳語更相招江南春物為誰好淇上歸心不自聊
何日結茅鍾阜尾幅巾相對一方袍

晚泊長蘆有懷金陵歷陽朋好 庚午十二月

賦

犀照亭邊兩艣催鳳栖臺下片帆開龍蟠虎踞行遠矣

斗渚雞籠安在哉無端鞍馬三年役有意尊鱸異日來
尊酒故人誰待我故應風月尚徘徊

上巳晚泊龜山作 元祐辛未作

薄暮東風不滿帆遲遲未忍去淮南故園猶在北山北
佳節可憐三月三蘭葉自供游女佩芸編聊對故人談
洛橋車騎相望客曾為吳兒幾許慙

揚州叙游 辛未二月賦

迷藏九曲屬樵耕野草閒花故有情廢苑春風遽如許

隔江山色可憐生新聲度曲復誰道古井酌泉聊獨清
杜紫微靈定相笑青樓薄倖不知名

和錢德循書懷 辛未四月京師賦

咄嗟世與我相踈歲月推排負壯圖狂客大難兼外監
方回小得勝常奴胸中累塊亦何有鬲上督郵非所須
徑買一舟歸自好五雲溪接當家湖

席上呈錢德循 辛未四月京師賦

東華纂纂桑葉肥老蠶起眠雛雀飛南鄰買酒勸行樂

越客廢書歌式微式微胡不歸明日會知今日非
舊溪手種水楊柳長與秋風掃釣磯

壬申上巳有懷金陵舊游

瓦官大庭千步方燈如流螢月如霜高僧共禮梅檀像
游女來焚熏陸香舊國破亡何物在少年逐樂箇儂狂
別來白社更牢落回首衡湘春夢長

送周元通昆仲官蜀 壬申正月賦

周郎弟兄皆可人外朗內潤連城珍尊酒逢迎記梁宋

聯驂行邁度咸秦寶雞道上冰雪晚金雁江邊梅柳春
公暇樂游須念我青衫白髮倦京塵

夢游金陵設堂故基

燕堂遺址壓西州剪徑捫蘿出石頭老木駸駸大相逼
連岡衮衮欲東流歌鐘誰話前朝事風雨魂驚別夢遊
夢境浮生更多病結茅歸老信悠悠

寄清涼和上人二首 壬申十月京都賦

吾家無擔石之儲朝四暮三如有餘北岳官糧飽妻子

南朝僧寺寓圖書迎船春色情親我望馬京塵笑謝渠
莫作江東步兵待翻然端不為鱸魚

南國風流百不存石頭今是給孤園山連雉堞猶侵路
潮送漁舟自到門方丈豈容居士病貝多應待客兒翻
縣知後日逢迎際桃李春風兩不言

寄李趙二友生

東風掠地百草青顛毛餘幾今星星長年嬰疾斷還往
無處避愁徒醉醒騃馬尋芳狹斜道銜舟待月滄浪亭

金定巳上卷七
卷七
遥輸此興二公子漲海未應沉一萍

呈李之儀 癸酉二月賦

淹卧疲筋快曉晴屋頭相報鶉鴉鳴病侵老境可憐許
春入故園何似生坐想蘭亭通曲水行聞上巳接清明
明年强健陪嘉集定奪三觥賦不成

贈張之才 癸酉五月賦

夙齡垂耳慕飛黃晚歲相逢兩漫郎
浼我青衫奈塵土誤君白首坐文章
折腰僅厭米五斗滿腹莫驕錢一囊

多病勞生餘有幾買山築室願鄰牆

載病東歸山陰訓別京都交舊 癸酉十月賦
我家湖水接山溪載病東歸路不迷城郭依然遼海鶴
鷗鴻邈矣會稽雞可須印綬懷中出幸有珠璣袖裏攜
行賦漁歌寄親串春風吹度淞江西

舟次淮陰呈邑令田望 癸酉至日賦

狂吟醉約昔悠悠衰病方諧散浪遊蔬粥滿懷供我飽
蘭舟繫岸判君留塵埃古刹尋遺篆香火鼓祠謁故侯

晚具不須烹赤鯉聊憑別後作書郵

高郵舟居對雪 癸酉十二月賦

天涯晚歲客無歡擁鼻微吟行路難
三楚浮程波淼淼五陵歸路雪漫漫
免園授簡心猶壯剡曲挈舟興久闌
病骨支離仍禁酒漁蓑重緝待春寒

留別王景通二首

早年放學五雲鄉遠笑垣東俠少場
憲也但貧猶未病公乎非酒自能狂
塵埃輦路春游散燈火僧窗夜話長

後日相思枉緘幅
茱萸灣北付漁郎

游宦差池大半生
君方倥傯我伶俜
官衙轉落百僚底
衫色渾偷兩鬢青
張掾官曹拋勝日
向平家事汨餘齡
相逢一段孟城夢
明發扁舟是浪萍

舟次廣陵懷寄京都交舊

朋游冠蓋滿京華
病客東流迹自賒
音驛未聞來日下
鄰牆不見亦天涯
尚慙斗粟煩官廩
已指扁舟是我家
莫謂因風無可寄
雪梅開遍臘前花

廣陵茱萸灣晚泊

冷雲拋雪未成花，過埭東風凍著沙。
荻浦漁歸初下雁，楓橋市散只啼鴉。
舊聞南國饒春事，行見東風換物華。
老病心情亦何有，藥囊詩卷是生涯。

題杜仲觀南康遺編後

高吟晚節動江關，自況孤雲豈易攀。
賦鵬一篇傳日下，騎鯨半夜去人間。
知音誰復稱流水，招隱吾方擬小山。
固有清風千古在，不應空伴月明閒。

慶湖遺老詩集卷七

欽定四庫全書

慶湖遺老詩集卷八

宋 賀鑄 撰

五言絕句百二首 六言附

感興六首 乙丑六月寓居彭城東禪佛祠有

雛雀集于庭樹為青鵲搏而食之予感而賦

六詩

雛雀學翻飛不知毛羽微青鵲笑高樹待爾飽朝飢
青鵲噉雀雛飫飽侮鵲烏不知皂雕力拏殺北城狐

皂雕獐臂爪飛走披肝腦不知游獵兒必爾鞬上老
獵兒燕楚俗得意唯馳逐不知廟堂上坐飽萬錢肉
廟堂擊鮮食日負天下責不知五湖上自有扁舟客
扁舟彼何人國霸始謀身不知釣魚翁羞作故人臣

懷寄寇元弼王文舉十首 乙亥八月彭城

尊酒津亭別還城何所投無情是流水斷送到南州

右初別後

東軒美風月詩酒伴歡呼昨日牆陰過依依見碧蘆

右過碧蘆軒

小市門南路舊遊聯馬行祇從前日別秋草一番生

右出小市門

南京一登望朔雁正來賓好去長淮北殷勤訪故人

右登飛鳴亭

百步洪頭水秋霖一夜渾相期濯纓去無復履綦痕

右游百步洪

何處延明月東城百尺樓故人那得見後夜是中秋

右登黃樓

不見西街客歸來即閉門胡牀面南樹鳥雀啁黃昏

右局中歸

暑雨茅柴熟秋風淮白肥留連阮校尉何日跨驢歸

右招元弼

後夜溪山雪臨門望子猷莫因清興盡半道却回舟

右招文舉

偶得悲秋句還驚舊社空中庭步明月朗詠與西風

右賦後詩

馬上重經舊游六言 丙寅三月京師賦

淺淺東流宛溪當年罷酒分攜認得橋邊楊柳春風幾度鴉啼

題惠崇畫扇二首 丙寅正月賦

春雪霏霏晚梅抱枝寒雀毳毳隴下有人腸斷為銜芳信東來

右梅花雪雀

塞南秋水陂塘蘆葉蕭蕭半黃直北飛來鴻雁端疑箇
是瀟湘

右秋水蘆鴈

答陳傳道五首 丙寅九月京師作以目送歸

鴻難為韻

客子厭京塵長街風迷目安得卧南陽清潭清寒菊
游梁復歸宋南北更相送失得兩如何勞勞不如夢
游宦幾人達不如強健歸未容誇畫錦幾見化緇衣

聞有高秋興清尊醉飛鴻應悲故人遠薄晚面西風
倒索黃金盡方悲行路難桂薪炊玉粒可是樂長安

擬劉孝勝詠安仁得果 丙寅九月京師賦

果盡猶招手車停更起塵固應持一笑先答近轅人

和王文舉玉臺體 丙寅九月京師賦

南城空目送西館斷心期縣知今夜思明燈半下帷

夢後聞蛩 丙寅九月京師賦

籠燈耿欲滅枕下蟲聲切底許事相關煎人腸斷絕

寒宵歎 丙寅十月京師賦

可憐明月光
委曲照空牀
自是元無夢
更悲今夜長

春晚樓上 丁卯京師賦

楊花吹後盡
春色但悠揚
獨立西樓上
持情向夕陽

和王文舉別館初夏 丁卯京師賦

薰風酣綠樹
午日思黃鸝
的的羅窗夢
西鄰可得知

和陳傳道秋日十詠 丁卯九月京師賦

近砌擲鳴籤
長簷素綆溼
翅暝鴉歸高
梧落深井

右秋雨

歸雲去悠悠長風來獵獵
簷角雨長楸斜陽暝黃葉

右秋晴

病骨倦空牀曳杖閒庭步
暗燭與寒蟲迢迢思風露

右秋夜

未捲半簾霜猶疑在庭月
倚樹汲清泉踈風獵華髮

右秋曉

霜空出華月尊酒聊相對
別夜復嬋娟故人千里外

右秋月

紛紛脫柯葉
袞袞斷根蓬
不待吹楊力
隨風亦自東

右秋風

宿雨塵霾靜
寒原黍稷空
臨風聊放目
不為送飛鴻

右秋望

擬從康樂公
雙躡登山屐
晴夜宿天台
披雲看初日

右秋興

梅梁巢已空
去此復何從
勿憚歸飛遠
冰霜不爾容

右秋燕

不復怒飛聲
朝雞得擅鳴
婆娑猶有地
媚竈畢餘生

右秋蠅

和同行潘生悒悒悠悠二首
戊辰三月金陵

賦

悒悒復悒悒
愁眠成夢泣
薄暮落花天
高樓面風立
悠悠復悠悠
淚寄東風流
所思悵何許
西北齊雲樓

長安在何許二首
戊辰八月歷陽賦

長安在何許疑是青天上
矯首遡西風溪雲斷人望
長安在何許疑在白日下
徘徊天一隅華月生新夜

懷寄清涼和上人二首
戊辰十月歷陽賦

不見江南客願聽江南鐘
傾耳度遙夜天寒多北風
試問江南客何時宜度淮
多情是湖水每自石頭來

梅華寄清涼和上人
己巳十二月廿三日石

磧戍北馬上賦

石頭城上客領取一枝梅
何事春消息今從江北來

送僧法印智因西上 庚午正月烏江賦

千里長淮北東風破雪寒此行休問路驀直到長安

懷寄彭城朋好十首 庚午九月歷陽賦

元弼今安健音塵久濶踈早年傾蓋意白首復何如

右寇三 別五年始再通問

努力張謀父躬耕老白雲無年儉足用此外奈何君

右張大 寄聲有田居食不足之歎

子仲安貧者毘陵久罷歸秋風一相憶賴有燕西飛

右劉四 名士真謫官毘陵罷歸已久

好在張居士雲龍寄夢頻西齋見風月連榻復何人

右張十七 聞廢雲龍山居增構城中西齋甚宏

邃

希遠來彭澤聊為三徑資拂衣歸底處命駕定何時

右董大 名初嘗攝沛長累月解印去職

遠計陳傳道窮秋亦罷官還驅款段馬吟雪向長安

右陳二 先子之官下邳今已受代

不見會之久每思詩酒豪扁舟由甬上乘興可須招

右王十三 期予罷官會甬上

子敏超龍級得官何處州他時趨洛下獨與士龍游

右王七 名適方第進士而喪其兄子立

寇叔情何厚郵筒數得書前春應上塚能訪酒家無

右寇十一 應之每歲上塚道由京都必訪予于

酒壚

試吏王文舉俄纒風樹哀明年道灘上為爾一徘徊

右王三 始調華亭刑獄掾以家艱罷今執喪宋

城

和錢德循古意二首 辛未五月京師賦

駕犁豈知耕布穀不入田大農坐官府百吏飽窮年
維漢南有箕垂象列三辰長司簸揚職糠粃居前塵

送王西樞出鎮鄭圃八首 壬申六月京師賦

千載君臣會將圖不世功卷收天下福偏厚古扶風
帷幄參神筭邊塵萬里清西藩聊偃息猶是一長城

公論由來重高懷此去輕吾非厚知已感歎此蒼生
新書許從事狡穴盪應空寄語征西將無矜獵犬功
前日神州尹聲華掩趙張春風長有待難樹是甘棠
來暖西樞席斯民賴已多前春鳳池水四海漲恩波
門闌曳裾客皆自許人豪今日宸廷下誰知北郭騷
袞繡行將復沙堤百里東病夫雖老矣猶解賦幽風

題海陵寓舍二首 甲戌正月賦

池上千條柳依依解占春自憐哀颯鬢不與物爭新

池上雪初消春鴉已占巢自憐流寓迹無物可誅茅

追和亡友杜仲觀古黃生曲三首 甲戌四月

海陵獲仲觀遺編追和此

朝為去山雲暮為還山雨誰謂物無情歡期不如許
歡歸夜何其月照臨門別後夜待歡來開門但明月
要知兩儂心等是他山石此誠不可轉彼情無自入

京居感興五首 丙寅秋彭城陳傳道見寄五

詩以目送歸鴻難為韻尋和答之乙亥八月

食貧京師復取手拊五絃易為韻五詩俟他
日示陳也

壯圖可復道罄折營五斗負郭二頃田何時落吾手
平生感激心炯炯徒自許塵埃五十絃難為齊人拊
稠人致高位一二難遽數驃騎彼將軍未應賢第五
擾擾塵籠下容身亦是賢橫屍道邊子共笑直如絃
長言與短調誰謂高游藝謾賦芳草篇長安居不易

和幽老郎官湖懷古五首 事見第五卷中丁

廿八月江夏賦

郎官老辭筆得爾壽春碑姦賊餘靈在斯人是僂屍
白也遭時網臨年放夜郎何妨去物遠當道橫豺狼
昔人泯黃壤陳迹變滄波劫火洞然壞無如佳句何
杜守王明府吾知夫不凡解持餘酒載一飫逐臣饒
岑輔何為者當年唱不磨名隨詩石在附驥兩青蠅

江夏八詠 丁丑九月采江夏陳迹未著於時

者賦之以補郡圖經之闕焉

祖龍礪長劍昔道此南巡徒挾雄銍利湘川奈水神

右磨劍池 在頭陀峯頂相傳始皇南巡磨劍於此石亦存焉

孟公泣竹地今是布金園不保五畝宅非無百代孫

右靈竹寺 相傳孟宗故居也

高岸已為谷斯人如蛻蟬固應留寶刻信是當家仙

右祖貫墓銘 祖字子元元和乙亥年過吾家外
監授丹及訣後六十年始化去壽九十五門人

許鼎為其埋銘載季真天台昇仙事甚詳後為
瓦官殘子元墓棺已空矣 此銘今在天慶觀

中

亡一章

右舒元輿榜 舒依郡士美僑居江夏太和二年
登朝方盡室去此將行題榜留于頭陀佛祠之
殿梁上至元祐中郡守王得臣始命李康年序
其事而摹刻于石榜失所在

亭揭奇章榜斯民孰去思多慙羊叔子涕泗峴山碑

右奇章亭 在黃鵠山最高頂牛僧孺登燕于此
後人因榜奇章云

南津趙陀石云是昔人舟長懷精衛志不擬長江流

右趙陀石 在鄂之南浦長十許丈高亦半焉相
傳昔人沉舟之所化也

西戌夕陽晴東城石鏡明有山名八字供作兩眉橫八
字山見戴洋傳

右石鏡亭 黃鵠磯有石明瑩可鑑亭占其上榜
為石鏡云

應龍昔此去雷雨助騰昇舊穴潛蛟蜃風波橫要津

右龍穴渡 相傳有龍出於此今為津步

變竹枝詞九首 戊寅上巳江夏席上戲為之

以代酒令

莫把雕檀楫江清如可涉但聞歌竹枝不見戲桃葉
隔岸東西州清川拍岸流但聞竹枝曲不見青翰舟

露濕雲羅碧月澄江練白但聞竹枝歌不見騎鯨客
北渚芙蓉開褰裳擬屬媒但聞竹枝曲不見莫愁來
西戍長回首高城當夏口但聞竹枝歌不見行吟叟
南浦下漁筒孤蓬信晚風但聞竹枝曲不見滄浪翁
勝槩今猶昨層樓棲燕雀但聞歌竹枝不見乘黃鶴
危構壓江東江山形勝雄但聞竹枝曲不見胡牀公
蒹葭被洲渚鳬鷺方容與但聞歌竹枝不見題鸚鵡

題畫卷後二首 元祐壬申京師為宗室令勗


文煥賦後八年文煥物故二圖為他人有復
見此詩錄之

塞驢烏帽禪客落日黃塵故關已悔棄繻昔去更逢挈
履今還

右關路逢僧圖

結茅百尺荒臺杖藜一徑莓苔謝絕雞羣老鶴不應端
為琴來

右鳴琴召鶴圖



慶湖遺老詩集卷八

欽定四庫全書

集部

慶湖遺老詩集

卷九拾遺
補遺

詳校官庶吉士臣陳若霖

侍讀臣孫球覆勘

覆校官中書臣宋枋遠

校對官中書臣王鍾泰

謄錄舉人臣劉禮

欽定四庫全書

慶湖遺老詩集卷九

宋 賀鑄 撰

七言絕句六十首

清燕堂 丁巳四月趙郡賦

雀聲嘖嘖燕飛飛
刺得殘紅一兩枝
睡思乍來還乍去
日長披卷下簾時

北園初夏 丁巳趙郡賦

天氣清和樹陰濃
冥濛薄雨溼簾櫳
薦紅半落生香在

向晚玫瑰架上風

秋風登城樓 已未七月滄陽賦

襲人風露覺秋初
臨水高樓更雨餘
天幕鮮明河影淡
行雲流月兩徐徐

初見白髮示內 庚申三月滄陽賦

安能屈指計封侯
西日東風見白頭
信是色身非我有
若論身外更悠悠

局中歸 庚申五月滄陽賦

心火成灰不復然故園笑別十三年晚涼退食無餘事
坐與兒曹挽紙鷲

野步 庚申七月滄陽賦

津頭微逕望城斜水落孤村格嫩沙黃草庵中疎雨溼
白頭翁嫗坐看瓜

和崔若拙四時田家詞四首 崔字至之庚申
八月滄陽賦

鼓聲迎客醉還家社樹團圞藥日影斜共喜今年春賽好

人字口唐 卷九
纏頭紅有象生花

野蔓牽花過短牆
麥秋時節併蠶忙
迎門父老延行客
井汲清甘樹蔭涼

雞聲犬吠遠相望
社酒登槽喚客嘗
曉日清明陂更濶
風吹喬麥密花香

晚雪漫漫沒兔罝
滿牀豆粥餉鄰家
夜長少婦無春織
一點青燈伴緝麻

西城馬上 辛酉正月潯陽賦

燭冷塵消過上元
清明風日柳初繁
偷閒偶到西城陌
喜見青山似故園

再遊西城 辛酉二月賦

柳條破眼已堪攀
鷺下城隅水一灣
後日重來寒食近
杏花林外見青山

東城送客馬上 辛酉二月潞陽賦

向午孤烟起客檣
一陂春水兩鴛鴦
漁童解唱滄浪曲
應笑塵埃馬上郎

魏城東 辛酉二月元城賦

短短宮牆見杏花
霏霏晚雨溼啼鴉
欲將今夜思歸夢
憑仗東風吹到家

成安道中懷寄馮惟逸 馮字日休趙郡滏陽
兩為僚友辛酉二月賦

蒼面黃鬚過壯時
欲投閒處兩難期
人生自是無根物
南北東西任所之

李固道中懷寄杜邯鄲 青堂在縣廨中辛酉

三月賦

西望叢臺百尺間
車輪無角不知還
大夫庭下長無訟
誰伴青堂整日間

僧居對雨二首 辛酉四月冠氏賦

簷雨濺濺滴砌沙
綠叢深處一榴花
小窗隱几俄成夢
堪笑無功飯後茶

平沙四繞護城隄
小雨經旬不作泥
似與幽人慰牢落
一雙黃鳥隔牆啼

再涉南羅渡 辛酉八月賦是夏大河西徙遂
可徒涉

滯水生苔沒馬蹄漲沙隱約見
現 金隄禹功寢久人無
繼未信東流不復西

金隄客舍望南樂城 辛酉八月賦

黃流漫渙浸城根烟火依微日欲昏
禾黍不登關政罪
居人猶得飽魚食

過澶魏被水民居二首 辛酉八月賦

帶沙畎畝幾經淤半死黃桑繞故墟未必鄰封政如虎
自甘十室九為魚

莫問居人溺與逃破籬敲屋宿漁舫中庭老樹秋風後
鸛鶴將雛奪鵲巢

離冠氏道中 辛酉十月賦

別酒厭厭一據鞍遠林微逕雪迷漫傷心不似來時路
柳擺東風絮作團

冬夜寄懷周文清郭天輔 辛酉十一月賦

壁缸向滅硯生澌仰屋重哦舊卷詩懸想北園閒散伴
青錢堆坐賭官碁

病告中會王錡見招 王字誠之臨城故人也

時駑馬亦病足壬戌正月京師賦

伏櫪駑駘伏枕人不應俱是厭京塵東城自有乘肥客
白苧新裁候探春

檣舟廣津門外作 壬戌七月賦

綵繅橋西七日留幾回回首鳳皇樓如何一葉扁舟裏

載得離人萬斛愁

晚泊會亭 壬戌七月賦

後日符離復捨舟馬蹄塵土入徐州祇應明月曾相識
伴我時登燕子樓

題承天寺竹軒 癸亥五月永城賦

征衫初解就僧牀惠我條然一枕涼赤日黃塵畏途裏
此君風味可能忘

楊柳枝詞二首 癸亥五月汲郡席上歌人楊

柔出二白團扇求吾詩

方過清明雨後天
回塘照影弄蹁蹁
蹁蹁深情擬屬風
光主
愛惜長條待少年

楊柳東風盡日吹
柔條應是不禁持
都門三月傷心地
強半青青贈別離

自衛還徐憇永城王氏園 癸亥六月賦

歸路塵埃懶著鞭
北窗仰枕碧雲天
柴桑此興無人學
負爾清風七百年

席上分韻寄陳傳道 得懷字 乙丑二月彭城

賦

忍穿布襪與青鞵困走京塵十二街擬仗飛雲與招隱
東風吹送落君懷

東平周村驛觀臨川吳公題 乙丑八月賦

頓轡揮毫墨尚新碧紗從此壁生塵可憐庭下長楊樹
猶有清陰待路人

九日會張謀父見招 乙丑彭城賦

昨夜新霜滿菊叢起來何面待西風白衣送酒無消息
賴有西鄰張長公

九日張謀父席上 乙丑彭城賦

浪竹低枝掃隙塵到簾清月欲留人西家一斛黃花酒
沉醉吳音賀季真

早發斜溝道中寄王有元 王字會之有詩見

寄云應無好夢到彭城因此畲丙寅二月賦
處處春林有鳥啼恨無芳酒一尊攜何緣復得彭城夢

日日東風送我西

泊舟永城寄京都朋游 丙寅閏二月賦

正西千里是青門橋下春流帶雨痕想見舊游芳草合
有誰樓上與銷魂

將發永城題陳伯雋蒙軒 丙寅閏月賦

幾對春風把酒懷小舟臨發更徘徊四明狂客重來日
庭下榴花開未開

京居暮春感興二首 丙寅三月賦

閒坊稅屋遠人羣
晨鴉昏鴉亦厭聞
無奈春風作多事
滿庭花絮正紛紛

擾擾奔蹄與疾輪
九街尋勝作狂人
東風漫送朝來雨
可奈長安自古塵

春夜對月 丙寅三月京都賦

麗景門頭初月明
清川燈火兩橋橫
一舟若許東南去
何啻西風羽翼生

遊夷門資福佛祠園 丙寅四月京師賦

百根高樹挂凌霄
顛顛飛來深處巢
心喜他年有歸著
白衣居士此誅茅

郊醉口號 十二月廿日賦

丙寅元祐初年冬
賀老因寓京塵中
無心炙手權門熱
曝背晴陽坐屋東

汴下晚歸 丙寅十一月京師賦

隋渠經雪已流水
乘興東游恐未能
試問何人知夜永
一樽相伴小窗燈

陳留道中 丁卯二月賦

強半春風掩戶庭
出門唯見麥青青
從來赤白歌桃李
曾與何人伴醉醒

過曹氏園馬上作 丁卯三月京師賦

香風細細出重牆
不見繁枝已斷腸
知有何人卷簾箔
卧看零落滿斜陽

和人傷春 丁卯三月京都賦

入簾輕絮故依人
夢後題詩欲判春
縱使相思解銷骨

此情終未作黃塵

重賦京居暮春感興 丁卯三月賦

怒風狂雨信悠悠收拾春花不少留
只有柳綿吹未盡牆陰落泊伴人愁

送人朝饗裕陵 丁卯三月賦

三年不見鼎湖龍弓劍塵埃玉座空
白髮孤臣心斷絕滿山明月柏城風

登興國寺樓 丁卯五月京師賦

怪槐風動綠鬢髻廊外風聞演梵僧
怊悵無人共樽酒
可憐明月最高層

李氏池上

丁卯七月京師賦

湖外西風吹雨絲半隨楊柳拂漣漪
女郎偷折藕花去
沙上鴛鴦睡不知

遊莊嚴寺園

戊辰五月歷陽賦

石榴花落小池清獨下平橋弄扇行
蔽日綠陰無覓處
不如歸去兩三聲

黃埭魏氏見江亭 戊辰七月歷陽賦

浮生欲寄酒柸間
馬上誰容一日閒
不是登高粗能賦
老夫真負爾江山

題贈芥堂老僧遇來 戊辰八月歷陽賦

歲計江邊二頃田
不能多應世間緣
閉門密竹荒松裏
柸粥爐香六十年

茅塘馬上 戊辰九月烏江賦

壯圖忽忽負當年
回羨農兒過我賢
水落陂塘秋日薄

仰眠牛背看青天

阻風小孤山晚晴 丙子五月四日賦

小孤山下晚波恬
妥墮青鬟玉鏡奩
借與彭郎作眉樣
西南初月正尖纖

題漢陽寓舍老桑 丙子六月賦

曾無沃若飽吳蠶
腹蠹聊供啄木饒
底事殷勤噴元緒
不應有意附炎災

秋江晚望 丙子九月江夏賦

黃蘆洲渚赤楓林林外斜陽疊障深記得廣陵城裏市
董源橫障賣千金

和吳達夫見過留題 丁丑清明江夏賦

崔羅門巷不容車杖屨相過一試茶後日相思會乘興
五雲溪上是儂家

題詩卷後 戊寅三月江夏賦

詩豈窮人窮者工斯言聞諸六一翁端慙少作老更拙
不廢汝詩吾固窮

慶湖遺老詩集卷九

欽定四庫全書

慶湖遺老詩集拾遺

宋 賀鑄 撰

古風一首

答僧訥 守訥鄭氏子字敏中三代第進士訥
亦兩至禮部既壯祝髮事師圓照本公庚午
十二月相遇于金陵以長篇見投其自叙于
此因答之

唐代衣冠高四姓 太宗之亞榮陽鄭不墜家聲五百年

桂籍相望三葉慶上人猛謝區中緣破冠投櫛還童顛
寸灰已滅五經笥來入辨才無礙禪我竊官糧衆人後
相逢宛是平生舊一聞南國白頭吟萬媿西風碧雲陋
老鶴終辭雞鶩羣誰將斷綆絆浮雲他日傳衣度梅嶺
解留何語與將軍

近體長句五十八首

登海陵齊雲樓 甲戌五月賦

樓外浮雲何可攀聊持尊酒共消閒歸心歛起登臨際

春色來從想像間
晚雪晞時見芳草
滄波盡處見青山
長安桃李行應好
解笑劉郎底未還

酬別曾忱 曾字誠之
嘗任共城尉相聞蓋久
而未始相際甲戌二月
曾自通川放還邂逅
于海陵將行為賦是詩

昔年室邇歎人遐
少日相逢別日賒
聊寄歸心天北雁
會乘高興斗邊槎
雷驚白晝龍蛇起
風蕩青春草木華
誰念渠伊獨憔悴
豈容平世賦懷沙

送張師常之官南雄 張累官嶺外結婚于海

陵因識之甲戌三月賦

爰居蹭蹬海西頭紫鳳求皇亦少留持酒一尊明日別
題詩幾處舊年遊春風白芷江南岸暑雨黃梅嶺上州
却望衡陽十里遠縣知無雁記音郵

送方安行之官高密令 方字必中有通籍休
官之志甲戌三月海陵席上賦得童字

平世功名輸阿童東書洗劍棲漁篷晚交東武百里長

想見桐廬三拜風白雪興闌吟社遠綠槐陰合訟庭空
他年朱紱來東道試訪釣鼇浮玉翁

送江與京歸山陽 江字茂宗甲戌三月海陵

席上賦得仙字

山陽澤國四無山百雉危城兩水關楊柳遙知紫極路
滄波長羨白鷗閒病來藥裏為吾累興盡漁舟送子還
風月異時何限思區區併入尺書間

紫極宮在郡城西
南隅楚人游觀之

地

海陵書事 甲戌三月賦

海濱流浪胡為乎況復支離百病餘三月逢梅識春色
半年無雁托歸書老烏啄屋巫呼鬼野艇橫門米換魚
回首揚州纔百里盡橋風月可憐渠

聞鶯有懷故園 甲戌四月海陵賦

海陵春後雨冥冥耳厭鼃鵲齒鳴何意東亭好風日
流鶯忽作故園聲故園千里常牽夢老病三年不廢情
想見楊花收卷盡綠苔池院落朱櫻

海陵西樓寓目 甲戌四月賦

天涯尊酒與誰開
風外徂春挽不回
掃地可憐花更落
卷簾無那月還來
王孫莫顧漳濱卧
漁父何知楚客才
強策驚筋懷故國
浮雲千里思悠哉

寄興化黃主簿杞 黃字原禹少年奉道世味
殊薄甲戌四月海陵賦

何準第五不足稱
黃童無雙非自名
卑棲鸞鳳安初仕
倅練虎龍希長生
明月高吟紫芝曲
紅塵先老白雲兄

莫辭一力走三舍，遽未能來頻寄聲。

海陵喜雨

甲戌四月晦日賦

閏年四月之相交，旱天雲物何蕭騷。
清風捲地換塵世，白雨入林翻海濤。
殊勝農兒踏車健，少寬病夫揮扇勞。
須晴徑買一漁艇，想見橫塘深半篙。

食鮒魚

甲戌閏月有人饋此，因賦詩。

雨長沙田三尺蘆，截江邏釣待嘉魚。
上鉤一尾夸先得，下筴千錢忍棄餘。
倦客罷彈腰下鉞，故人忘寄腹中書。

知機何待張生翰不俟秋風已起予

鯽魚初得尾直千錢

題海陵寓舍四首 甲戌閏月賦

藜藿荒庭微徑通支撐破屋古池東
暮涼百燕抵突雨晝靜一蟬饕餮風
隱几敢希南郭久移文方誚北山空
森然槐柳相差地他日低徊憶箇中

近濕籬根歌蟋蟀向明屋角網蜘蛛
黃葵紫萼雨張王

二字並去聲

花蚊白蟻風驅除輾轉猶增夏夜久
支離何堪

春病餘預愁還作舊年調兩眼京塵滿鏡湖

倒嶂開窗面曲池塵襟初喜豁然披清風殊不去人遠
明月端能與我期鼓吹青鼉聊自喜歌謳白鳥漸相欺
紛紛利害朝昏出閉目忘言是住持

千里家園安在哉羈棲猶喜占池臺酒非從事斷年別
風是故人彌日來黃鳥綿蠻紫椹熟白鷗澆潏綠萍開
頗知老子機心廢留得渠伊興盡回

聞蘇眉山謫守英州作 甲戌五月海陵賦

嶺首登臨楚粵分披襟先喜得南薰座隅鵬鳥敢要賦

溪下鱷魚知畏文酒洗黃茅瘴時雨嘯驅碧落洞中雲
高才何假江山助未擬區區詠五君

寄金陵和上人前歲嘗以二詩寄和有卜居之
約久未見報

舊年問米欲東流先賦新詩寄石頭赤鯿久沉江上信
雜縣誤落海邊州想君道眼遙相識顧我官身可自由
香火因緣知有在草庵蔬粥不他求

許永席上賦 許字子長家釀甚美名十八仙

時予抱病節酒而歡亦同之甲戌中元日海陵賦

流浪江湖跨兩年西風猶駐木蘭舡可人方外二三子
與爾樽中十八仙處女妾同公子議麴生未減索郎賢
自憐衰病方轟飲也在劉家幕下天

訓別道師許自然 許山陽人嘗為郡道正後
補茅山都正懷土北歸寓紫極宮將謀西上
求試所學以詩投因訓之乙亥正月山陽賦

早慕浮雲恥繫匏冷然風馭起三茅青菁可種無間地
黃鶴歸來失舊巢石鼎可傳驚俗句醉圖未免取僧嘲
何須西望長安笑誰是平生莫逆交

題任氏傳德集 任中立承制既死交親賦詩

弔其不遇者凡百人集而名之曰傳德二子
廣離亦有學術乙亥三月與吾相際于永城
求吾一詩

釣魚公子學屠龍潦倒西班八品中鼠目獐頭登要地

雞鳴狗盜策奇功儀刑拔士無光祿經術傳家有聖童
慨想斯人安可作九原松檟幾秋風

送周開祖出守鄱陽 乙亥六月京師賦

三尺京塵袞袞中畧無閒地貯清風鱸魚菰米經年別
皂蓋朱轡一日東俗眼強分青白在芳樽未覺聖賢空
鄱陽不乏江山助高興都盧屬謝公

贈僧彥 彥字純老庚午冬泊舟秦淮屢與純

老過鍾山泉禪師丙子三月再由金陵泉公

化去已累月賦此詩以示純老

昔年杖舄幾相從
同遇彌天漢上翁
早恨揚舡南浦別
俄驚掃地北山空
壯心脫落浮雲外
病骨支吾夢境中
賴有西岩舊桃李
異時應許共春風

秦淮官柳二首 丙子四月賦

秦淮兩潮西復東
淮邊楊柳酣薰風
送春白花去漠漠
避日黃鳥啼匆匆
陶彭澤多倦宦歎
桓琅邪今衰病翁
此身會復有健日
擬就綠陰橫釣蓬

西來載病一扁舟建業江山負勝遊楊柳經眼方自得
蒲帆臨掛復淹留長條似舞前溪曲卷葉宜翻出塞愁
想見南朝舊人物可憐能箇樣風流

和別清涼和上人 和結西菴招吾歸老故有

落句丙子四月賦

明朝解攜白鷺洲後日相望黃鶴樓建業水清供白酌
武昌魚賤足音郵著身物外不無處俛首人羣非有求
願報西庵落成會待公退卧儂歸休

重別和上人 和以予扶病之官臨分屑涕予
因留舊寫真以結西庵之緣丙子四月賦

分手風波路幾千 侵尋老境百痾纏 一官得飽亦勞矣
大士忘情獨泣然 北道音塵長斷望 西菴香火不無緣
是身脫使先朝露 圖像聊依十七賢

留別彥上人 丙子四月金陵賦

道人臨別重留連 應念吾生汨世緣 拄笏看山猶故態
量船載酒異常年 興來不計遠千里 休去可須持一錢

會作清涼老庵主兩盂分粥對牀眠

留別王間叟 王方閉關誦佛書丙子四月賦
婆娑晚境不知還邂逅故人增厚顏次道志包宇宙外
子年身寄江湖間一乘妙義想冰釋九死餘生非石頑
敢負清涼阿師約西菴先辦十年閒

烈洲守風 丙子四月賦

張帆早發石頭城淹泊風波百里程白芷汀洲潮進退
黃梅村落晝陰晴官糧牽迫少休日藥物扶持多半生

深閉船扉謝漁老自慙塵垢滿衿纓

晚泊三山懷古兼寄歷陽朋游 丙子四月賦

三山春水拍江流
六代餘風掃地收
破國龍驤復安在
賦詩宣城難與酬
傷心遠宦北宗老
滿眼舊游南豫州
寄聲好住數君子
一別相忘風馬牛

晚泊東采石磯 丙子四月賦

謝衛將軍憐苦吟
素臨汝郎遭賞音
風流人物豈如昨
形勝江關留與今
控鯉直思凌浩渺
然犀何暇照幽深

莫招捉月翰林老屈曲塵間猶陸沉

槎舟姑熟溪 丙子四月賦

潮來姑熟半篙深帆落溪口檣如林謝氏青山失故井
桓郎白苧無遺音良游躡屐負登覽衰病伏枕方呻吟
箇中二項了吾事怡悵十年懷此心

蕪湖王敦城下作 丙子四月賦

斗立孤城日四圍賊奴曾未懾天威風生虎帳豺聲厲
塵犯龍顏魚服歸首揭大航遺臭在歌流樂府舊音非

當時不慕桓文舉草滿中原胡馬肥

題皖山北瀕江田舍 丙子四月賦

江轉皖公山北流蕭閒人物美田疇一溪春水百家利
二頃夏秧千石收小市竹樓張酒旆平橋松島蔭漁舟
莫知農老何為者幾葉傳封樂國侯

晚泊小孤山作 山與彭浪磯相對沐猴鸕鷀
分占其上丙子五月賦是晚大風

江勢東南陡折回兩山屹立地維開顛風裂石轟雷下

駭浪澎湃卷雪來捫蝨王孫初睥睨飽魚烏鬼但毳毼
物情豈識忘形樂嘯倚檣干獨快哉

得周元翁蘄春道中書 丙子八月漢陽賦

離離赤棗牆東林開窗下榻依牆陰杖藜相顧賴之子
隱几忘言知我心晚契初逢一東野清詩屢擲雙南金
官身為米自南北世路亡羊無古今夢澤草荒孤驛遠
洞庭雨入滄江深相思何以祝高韻桂樹秋風吟玉琴
送漢陽刑獄掾鄒永年解官歸養 鄒字天錫

其父以朝散郎告老因補此官會有大臣薦
其文再起造朝天錫復落仕籍將行求吾詩
丙子八月賦

高歌每憶故山薇笑擲青山換綵衣竟為蒼生安石起
本來男子次君歸脫冠弭櫂興非淺戴笠乘車誓莫違
明日渡江聊贈別武昌官柳尚依依

登頭陀寺峰頂庵 丙子八月江夏賦

磴道凌虛挂白虹頭陀上方黃鵠東滄溟五夜浴新日

老木三伏來淒風北夢南雲展張濶縱江橫漢并吞雄
楚鄉絕境此其一付與微吟多病翁

九日寄維揚劉明仲 劉字冲光淮南故人也

丙子江夏賦

揚舲瓜步背瓜洲底處孤亭是玉鈎蠟燭有心啼別夜
布帆無恙到南州黃華嘉節與去何事白髮故人分取
愁賴有滄江知客恨長年西北望京流

江至鄂渚
即西北流

江夏秋懷三首 丙子九月賦

陳物紛然眼界中
長年何與偶書空
滄浪難為俗子唱
絡繹漫催貧女工
風月少容休吏役
烟波長與濟途窮
功成身退非吾事
猶辦扁舟東復東

人物駸尋迫暮遲
秋風萬里來如期
幽蟲切切竟何道
羈燕忽忽將安之
洛下微吟聊擁鼻
西山爽氣為支頤
肯將翰墨悲流落
寄語三閭彼一時

此身豈復繫西東
流浪江湖伴塞鴻
曲突非圖三爵客
直鈎何羨六鼇翁
千年陳迹祇今日
萬里故園闕箇中

金匱要略卷之三
拾遺
冗散偶逃人指數未應吟嘯坐妨公

書國志陳登事後 丙子九月江夏賦

求田問舍良可嘉元龍偶未思之邪黃鼠長為太倉耗
白雲猶有青山家人生歛爾待鑽石世故紛然勞筭沙
銷磨髀肉亦何事竟作子陽同井鼃

寄別秦觀少游 秦南遷桂陽舟過沔上隔江
不及見因寄是詩予三為錢官丙子十月江

夏賦

沔陽湖上小留連疑是前時李謫仙
流向夜郎才半道經還江夏樂
當年箇儂生以才為累阿堵官
于老有緣待得公歸吾亦罷
春風先辦兩漁船

潘耒老出十數詩皆有懷蘇儋州者
因賦二首

丁丑四月江夏作

人烟寂絕鬼門關更指儋州杳
莽間三四月交天漏雨東南地
盡水浮山依迷春草鷓鴣原
失響像秋風鶴馭還回羨河陽
賢父子雪堂曾作十年閒

舊隱江城東復東堂前楊柳付春風猶傳白雪興中曲
俄失黃梁夢後翁儋耳吉音無雁使峨眉爽氣屬狙公
不應更廣窮愁志悟取平生坐底窮

有僧自峽中來持黃黔州手製茶魚能道其動
靜與潘幽老賦二首 豫章人聚白金十餘
斤以寄魯直付一士子竟隱之不送故有黃
犬之句丁丑五月江夏賦

未聞東觀奏書成俄見西南萬里行從坐何關李都尉

補亡猶待褚先生心
縣黃犬沉來耗耳
慣青駒祇舊鳴
時節私庭差自慰
鳳將雛去雁隨兄

平生得祿僅榮親
持底天涯料理貧
夜戶不關無長物
晨炊待火乞諸鄰
山獠頗俠能來虎
水弩何知枉中人
少減家園舊年調
攜籠先采雨前春

中秋日懷寄潘幽老
潘將歸黃岡獲田故有
落句丁丑江夏賦

西戍角聲清且哀
東城鼓動殷然雷
雨闌伏檻月可待

風橫艤舟君不來得酒未容歡獨伯把書端與睡為媒
雪堂歛穀急還舍更約頭陀黃菊開

重寄潘幽老 丁丑中秋以少酒欲致潘來答
云侍親燕甚歡翼日再賦此寄

輕舠驚水帆如弓一伸臂頃來江東聊持美酒致吾子
方事綵衣娛汝翁懸榻可容他客坐閉關正與無月同
夙興行樂竟何有醒醉陰晴皆夢中

潘幽老以長篇求假吾書以副本送之 丁丑

九月江夏賦

元凱有言君盍知借書還書皆可嗤家傳五載亦勤矣
吾與兩雛當共之吏役豈容方外駕古人端在箇中期
聊分副本天隨子輯綴來歸是一奇

示王泌 王歷陽之舊也相別八年會于鄂渚
憐吾衰病因以示之丁丑十月賦

違離南北幾星霜短髮蕭蕭帶尺長執戟郎効官落拓
楚邱生觸緒悲涼雙鳬乘雁誰比數拉虎批熊猶健強

端恨養痾妨廢酒尊前都屬箇儂狂

答致仕吳朝請潛登黃鶴樓見招 吳字達夫
與吾為忘年之友兼示慎獻玉故有落句丁

丑十一月賦

城隅黃鶴莫登臨端使悲翁動楚吟日下長安人共遠
天圍夢澤歲方陰北風欲雪雁飛急南渚始冰魚伏深
誰似草堂安隱客下帷隱几不求心

雪後同達夫慎獻玉登黃鶴樓 丁丑十二月

賦

歲律崢嶸臘盡頭風吹朔雪到南州三湖簸蕩蛟鼉恐
七澤迷漫狐兔愁狂客定回青雀舫獵兒初試皂貂裘
江樓伏檻迎新霽羣玉峰前練帶流

曹永州哀詞 曹名暉字季明昔相際于永城

喪過武昌歸餘杭卜葬靈隱山諸子來求吾
詩為此賦戊寅二月旦日

老眼春風兩淚傾總惟樽俎異生平可驚人與琴俱絕

拾
但見肴晞酒復清相合水邊傳美政飛來峰下啓佳城
翩翩五六奇男子官使高門墜厥聲

登黃鶴樓懷古兼寄潘幽老昆仲 幽老弟大

觀字仲遠戊寅五月賦

漢大將軍楚國材半生倦韻浼塵埃徐夫人匕首安在
丁令威華表歸來紫府無蹤勞仿像白雲有待久裴徊
樓標空濶天垠露川勢縱橫地軸開隴鳥賦成洲共永
越人歌斷櫂先回會招物外二三子長嘯披襟挹快哉

寄武昌方令臨李尉援兼簡黃岡二潘昆仲方
字孝能李字文舉戊寅六月江夏賦

好在桐江三拜翁謫仙之裔好應同如聞花縣兩郎子
興發能來一水東共醉南樓故時月斷無庾令浼人風
季真老病不堪酒澤畔微吟懷四儂

二月二日席上賦 乙亥江夏時推官陳扶將
之荆南法曹萬邁彥亨罷官歸鄱陽予亦抱
疾此詩偶亡去庚辰十月邂逅同席客復得

之因附卷末

仲宣何遽向荊州
謝惠連須臾少留
二日舊傳挑菜節
一樽聊解負薪憂
向人草樹有佳色
帶郭江山皆勝遊
載酒賦詩從此始
他年耆老話風流

七言絕句二十首

斗峴山馬上
戊辰九月歷陽賦

西來投策倦躋攀
晚葉寒華一逕間
盡日間雲不留雨
斜陽還照隔江山

登如方山 戊辰十月歷陽賦

楚郊十月尚聞蟬
傍道黃華亦可憐
特上西山最高處
長安應在夕陽邊

渡冷水澗投宿萬歲嶺 戊辰十月歷陽賦

蕭蕭黃葉一清溝
白鳥飛來故少留
今夜行人短亭宿
小窗風雨夢漁舟

重游寄老庵懷僧芝 戊辰九月望與僧法芝

同游芝有詩云
淡游聊得慰孤悶
誰問當年

寄老心後月許日復為是遊芝公西上已達
京都矣

淡游已恨失芝公陳躅空留夢境中欲問孤雲何處去
庭前雙樹自西風

寄有捷上人 捷鄱陽人嘗住杭州安樂山戊
辰二月與吾相際于盱眙留七日稅舟西上
已巳三月有書見寄因以此謔之四月望日

烏江作

捷也當年避畏途寄身一葉泛隋渠定須慙愧操舟子
千里風波汝渡吾

曉晴西郊馬上 己巳九月歷陽賦

夜雨蕭蕭徹曉聞不應為我掃塵紛弄鞭十里西郊道
但見青山納白雲

重游梵行院 己巳十月歷陽賦

曉渡南岡五里松精廬未見已聞鐘門前拂地垂楊柳
掃淨秋來過馬蹤

同張漢求宿升中院西寮 己巳十二月烏江

賦

僧閣窗扉學畫船青熒燈火對牀眠北風帶雪披簷竹
渾似瀟湘夜泊天

送僧法印志因西游京師 庚午正月烏江賦
刻雪裁冰物外人強隨肥馬走京塵未應無地栽桃李
江北江南一樣春

重游鍾山定林寺 辛未正月金陵賦

破冰泉脉漱籬根
壞衲遙疑挂樹猿
蠟屐舊痕尋不見
東風先為我開門

題賈氏廢園 辛未二月京師賦

丞相園林半手栽
清尊曾為幾人開
荒榛野蔓換桃李
慚愧春風如故來

東城馬上 壬申二月京師賦

綵虹橋下水關東
接畛園林狹逕通
繁杏半開隨半落
短牆無計礙春風

重送曹誠之兼簡俞澹陳庚 俞字清老陳字
敏善皆維揚故人甲戌三月海陵賦

春風漠漠老江籬行矣騷人好自持半百幻身如且健
石頭城下兩茅茨

陳顥俞散舊朋游尊酒相從定少留衰病故情猶有在
春風一夜夢揚州

平野堂重送江茂宗 甲戌三月海陵賦

東風南浦雨瀟瀟欲去行人不自聊誰道垂楊攀折苦

過春猶有最長條

追永杜仲觀咏蝶 甲戌四月海陵賦

黃蝶尋花日百迴
荒庭多雨漫莓苔
老狂能似徽之輩
借宅猶應乞竹栽

題芭蕉葉 甲戌五月海陵賦

十畝荒池漲綠萍
南風不見芰荷生
隔窗賴有芭蕉葉
未負瀟湘夜雨聲

留別僧永 乙亥二月盱眙賦

三處分攜跨兩年浮雲生計本悠然江山勝地端相待
大有東南未盡緣

折中倉觀米元章題字 時米客揚州乙亥六

月京師賦

銀鈎入木揜鍾王拂眼清風識楚狂淮海京塵兩流落
與君大是覺身妨

放舟過津門外作 乙亥十月

國門欲去尚遲遲况復淒風落照時猶有京塵坐舟尾

惱人無幾度元規

慶湖遺老詩集拾遺

欽定四庫全書

慶湖遺老詩集補遺

宋 賀鑄 撰

廩伏讀前集序云自己卯歲嗣有所賦別為後集所謂
後集以經兵火散失不復得近搜故藁所遺及于佛祠
廟宇題詠泊碑刻鐫勒并士大夫親戚傳誦得其一二
皆此集中無者故續書卷尾為後集之補遺廩老矣不
復得全其集後之子孫續有得者當綴其末

黃山席上別當塗僚友

自昔有宇宙便應有此山如我與君者幾輩來躋攀聲
迹兩磨滅寥寥千古間短生一浮漚妄比金石頑五福
人所願九齡神所慳著身名利場寵辱如循環不見倦
飛鳥翻然亦知還酒闌解袂去老矣遂投閒

右見遺藁

九日雨中作

九夏赤旱百井枯三秋積雨釜生魚凌高徑醉不易圖
問底黃葉今有無願致皎白來庭除昏瞳爛卷勤卷舒

管中一班聊自娛未羨北里鳴笙等少日用壯膽力麓
六鼇可取負而趨誰謂哀遲百病餘雀鼠入屋不受驅
長缺長缺歸來乎泥深沒蹀行無車咄嗟蠟屐非雙鳧
安得翩然過故都

右見遺藁

送何安中之官新安錄事

帶郭荒山百匝牢躋攀幾見病猿孫官糧可數才雞肋
吏事縣知倍馬曹芸閣有書行且召萱堂須養未容高

慶湖老子何堪別
隱几僧坊更寂寥

右見遺藁

送時適歸彭城兼寄王會之并張白雲

壯年客宦樂徐州
五見黃華戲馬週
無復登山拋舊履
不堪臨水送歸舟
東城公子猶三逕
南野先生久一邱
為話吳門非樂土
鱸魚菰黍漫淹留

右見遺藁

方明古免喪西上山陰賀鑄方回以詩送行非

敢贈言聊書美志

西上遲遲誰挽留了君方寸慕松楸三年既盡亦當起
五斗有餘非所求早歲向風勞企羨殘生指日願依投
得官倘近柴桑里應許江邊著釣舟

右見遺藁

清明病中

寒食晴暘少江南此候同侵晨潑火雨薄暮駕潮風目
力書籤上生涯藥裏中可憐佳節物似不繫衰翁

右見遺藁

題葉翰林道卿手書唐人唱和集

翰客文房萬卷餘
說說翻是蠹書魚
載薰載曝徒為爾
秦築長城錯備胡

右見遺藁

題項羽廟三首

分張天下付羣雄
回首咸陽捲地空
六國三秦隨擾攘
錦衣何暇到江東

楚都陳迹久灰埃一曲虞兮尚寄哀不作偷生渡江計
可須千里更西來

三戶睢盱竟破秦君王武畧世稱神途窮一夜無遺恨
挈首殷勤予故人

錢塘海潮

高岼如陵累石頑一支漲海橫中間九軍雷鼓震玉壘
萬里墨雲驅雪山秦政維舟羞膽怯史遷舐筆恨才慳
錢郎幾許英雄氣強弩三千擬射還

右見遺藁

吳門秋懷

吳門客鬢再經秋，城郭籃輿久倦游。
平靜松江三萬頃，不應無處著漁舟。

右見遺藁

丹陽客舍示曾紆公衮

眼裏鉛華今日見，胷中冰炭幾時除。
欲知老子消懷處，靜夜青燈一卷書。

右得于兩浙漕曾紆公袞

鑄年五十八因病廢得旨休致一絕寄呈姑蘇

毘陵諸友

求田問舍向吳津欲着衰殘老病身未拜君恩賜剡曲
歸來且醉鑑湖春

鑄六代祖廣平郡王在五代間久從宣祖皇帝
游因納女事太祖皇帝封孝惠皇后賜第在開
封隆和里當時宣祖太祖太宗潛在邸中每喜

飲臣家酒後來鑄高祖六宅使嘗一日預內宴
內有旨宣索遂進舊酒并釀法就賜名鑑湖春
鑑湖先生酷志嗜書未老挂冠告歸滿朝榮
慕真漢之二疏也以詩卜居于姑蘇毘陵兩
郡親舊和之者皆一時名公柄于先生門下
有姻契亦嘗作兩韻今豫登欲補完後集記
錄以呈豫登倘不棄孤陋許以柄詩附先生
集尾使晚生廁名于其間抑何榮幸也晉陵

鄔柄德久詩云清監風流賀季真先生端是
昔人身如何未老催歸去要卧烟霞兩郡春
其他名公和者柄失記

題毘陵僧舍二首

古寺相留跨兩年窮通出處固天然短檠燈火掩書卷
屢聽芭蕉夜雨眠

秋風忽起家山意流落天涯歎憔悴古寺不掛褰瀛圖
終南山翁何處至

右得于晉陵孫覲仲並

和題毘陵薦福寺紅梅

一種梅生禪老家屋簷古榦恣敷斜詩人莫訝深紅色
可勝尋常桃杏花

右得于孫仲並再得于僧惟訥云從教盡作深紅
色絕勝尋常桃杏花

吳江送客

送別松陵道輕舟助客拏湖空剪葭莢市隘集魚蝦薄

雨啼殘雪新潮蝕嫩沙鏡中羞沓颺行復見春花

右得于屯田郎官范雱伯達

題流香亭

秋色朝來已十分遠山清瘦露雲根芙蓉昨夜驚風雨
葉葉流香有淚痕

右得于屯田郎官范雱伯達

王迥子高挽章五首

我昔官房子長懷忠穆賢里無行馬第山有卧牛阡當

代三公後維君五福全桐棺遠歸祔追舊幾潛然

卓爾金閨彥頎然玉筍班周旋三友益零落十年間輶
輶靈輶動悠揚素旄還暮年懷抱愛應未辨追攀

蕭散竹林風平生略約同官班魏叔夜年輩晉安豐民
詠濡須政朝推胸臆功九原無復作埋玉恨何窮

南浦維舟訪東堂抵榻眠後期猶指日輕別遂終天墨
妙今初貴詩鳴久已傳清風知未墜諸子更翩翩

已矣知無憾賢愚共此途白駒馳白日黃髮掩黃壚和

氏終還趙干將不葬吳驚痾如可強猶擬奠生芻

右見王公治行集

約十客同集金山米芾元章約而不至坐中分
題以元章未至分韻作詩拈闍韻應口便作
滯思即罰巨觥予得章字

九客相逢思楚狂停歌罷缺緩行觴座中那更添嚴令
分韻吟詩招阿章

右得于將作監米友仁元暉

題秦觀少游寫真

淮海多才士徒希為少游誰容老芸閣自識死藤州狀貌披圖爽陽春掩卷愁湛郎長鬣爾殊不嗣風流

右廩省記

別王鉉性之

吾老無北里子能詎南來臨分即間訣薄暮更徘徊晚節狗微尚方剛患多才此生南與北出處兩悠哉

右廩省記

慶湖遺老詩集補遺

欽定四庫全書

慶湖遺老詩集附錄

元豐末年始筮仕與方回俱在彭城為同僚友自是一別聲迹不相聞蓋三十餘年矣政和甲午秋八月予還自京師過平江謁方回披腹道舊相視惘然如昨夢耳方回之詩予見之舊矣復出鑑湖集示予其辭義清遠不見雕繪之迹渾然天成殆非前日詩也方回自少有奇才其器業足以自表於世意功名可必也逮今流落

州郡不少振豈詩真能窮人邪然方回詩益工名日益
高其傳不朽矣與世之酣豢富貴與草木同腐者豈可
同日議哉以此易彼可以自釋也是年冬十有二月庚
申楊時書

宋故朝奉郎賀公墓誌銘

信安程俱撰并書 信安毛友題額

公諱鑄字方回其先吳公子慶忌避公子光亂奔衛妻
子散走越越人與之湖澤之田表其族曰慶氏漢避安

帝諱改氏賀至唐有為陽穀令名知止者于方回為十
五代祖其後北徙終止開封孝惠皇后克配昌陵家世
仍以才武顯曾祖維能左侍禁祖維慶東頭供奉官閣
門祇候贈左千牛衛將軍父安世內殿崇班閣門祇候
贈右監門衛大將軍母秦氏贈令人方回幼孤立不羣
濟良恪公克彰擇妻以女授右班殿直貧迫於養非其
好也監軍器庫門臨城其酒稅磁州都作院徐州寶豐
監和州管界巡檢辭所當遷東頭供奉官封其母永年

縣太君元祐七年學士清臣百祿軾薦于朝改承事郎
請監北獄廟監鄂州寶泉監丁母憂服除以宣德郎通
判泗州遷宣德郎通判太平州管勾亳州明道宮再遷
至奉議郎遂請老以承議郎致仕時年五十八二年從
臣薦起之以故官管勾杭州洞霄宮遷承議郎賜五品
服以后族恩遷朝奉郎明年復致仕又六年年七十四
以宣和七年二月甲寅卒于常州之僧舍夫人趙氏前
葬宜興縣清泉鄉東篠嶺之原至是以九月甲申葬公

同六穴方回豪爽精悍書無所不讀哆口踈眉目面鐵
色與人語不少降色詞喜面刺人短遇貴執不宥為從
諛然為吏極謹細在筦庫常手自會計其于室罅漏逆
姦欺無遺察治戎器堅利為諸路第一為巡檢日夜行
所部歲裁一再過家盜不得發攝臨城令三日決滯訟
數百邑人駭歎監兩郡狡吏不得指其私蓋仕無小大
不苟要使人不能欺而用不極其才以老自右選易文
階時薦者皆有文名且當路顧願為獄祠吏退居海上

三年乃復就莞庫元符靖國間除太府光祿寺主簿辭
不赴卒請補外自去姑熟及告老再仕凡十五年不離
宮祠吏觀其骭骭任氣若無所顧忌者然臨仕進之會
常如臨不測淵覷覷視不敢前竟疾走不顧其慮患乃
如此與蹈污險徼幸不為明日計者殊科有鑑湖遺老
前後集二十卷子為序尚可考樂府辭五百首他文數
十百篇方回姓氏聞天下其詩詞雅麗有古樂府之風
讎書至萬卷無一字一畫譌闕老且病猶搢搢不置云

二子曰房承節郎監保州酒稅曰廩將仕郎二女皆嫁士族孫男女五人政和間予居吳方回病要予曰死以銘委公矣今年春病甚見予毘陵復理前約且曰平生果於退懼危辱耳今知免矣將葬其子又以治命來求銘銘曰

其進踏蹶若將越于谷其退若逝惟危辱是畏依隱傲世世亦莫吾厲卒安其所是以無悔

公娶濟良恪公之女公之子提幹君廩復娶良恪公之

孫實外姑之親姊故子獲識其子省幹君承祖者嘗從訪公遺文曰先祖昔寓毘陵中間擾攘凡所著文編悉為虜酋攜去獨巾箱有別錄慶湖詩前集在固假傳寫正其字畫訛舛而疑者因之又從趙氏得公墓刻併書于卷末庶知公之出處本末云乾道丙戌歲仲夏望日邯鄲寇翼令威父記

留題左顧亭二首 孔愉放龜之所

餘不

平


亭下棧歸舟訪古懷賢百刻留辦得千金脫元

緒此心端不為封侯

亭際高樅滿百圍不無山鬼此焉依
咿呦為話當年事
曾見將軍佩印歸

賀公詩詞妙天下幼年每竊聞諸老稱其名章俊語
今詞盛行于世詩則罕見予傳錄此編久矣意俟後
集并為鋟木念未易得恐失因循迺以所積節儀折
色等錢刻置郡齋頃為德清令邑子以公留題左顧
二絕相示嘗揭之亭上今附載于是紹興壬子七月

朔晉陵胡澄題



慶湖遺老詩集附錄